

四庫全書

集部

欽定四庫全書

集部

宋文鑑卷一百二十九

七至

詳校官監察御史周元良

助教臣常循覆勘

總校官降調編修臣倉聖脉

校對官中書臣李荃

謄錄監生臣楊遐齡

欽定四庫全書

宋文鑑卷一百二十七

宋 呂祖謙 編

雜著

告友

王 回

古之言天下達道曰君臣也父子也夫婦也兄弟也朋友之交也五者各以其義行而人倫立五者義廢則人倫亦從而亡矣然而父子兄弟之親天性之自然者也

夫婦之合以人情而然者也君臣之從以衆心而然者也是雖欲自廢而理勢持之何能也惟朋友者舉天下之人莫不可同亦舉天下之人莫不可異同異在我則義安所卒歸乎是其漸廢之所繇也君之於臣也父之於子也夫之於婦也兄之於弟也過且惡必亂敗其國家皆受其難被其名而終身不可辭也故其為上者不敢不誨為下者不敢不諫世治道行則人能循義而自得世衰道微則人猶顧義而立剛有不若其亦無害於

衆焉耳此所謂理勢持之雖百代可知也親非天性也  
合非人情也從非衆心也羣而同別而異有善不足與  
榮有惡不足與辱大道之行公於義者可至焉下斯而  
言其能及者鮮矣是以聖人崇之以別於君臣父子兄  
弟夫婦而壹為達道也聖人既沒而其義益廢於今則  
亡矣夫人有四支所以成身一體不備則謂之廢疾而  
人倫缺焉何以為世嗚呼處今之時而望古之道難矣  
姑求其肯告吾過也而樂聞其過者與之乎

記客言

王向

客有語西師者道劉平石元孫敗時事初起鄜延兵十萬人吐谷坂欲與賊遇乃戰戰時昏矣賊多解馬休勁兵驅老弱對敵士卒得利人人出死力與戰投夜且息更三起鬪會明老弱畧盡士卒爭獲過當悉已疲番軍始徐鼓起士揭新旗乘高處呼漢兵來鬪軍士氣失金鼓皆不敢鳴賊稍出馬馳略陣上調呼射軍中軍人多死此時特劉石軍也前此分萬餘人屬監軍黃德和使

屯西坡且以張嚮背為游聲動賊幾得相應援去事已  
急念引去賊必乘之恐逼險不利不如合軍決死幸有  
所完兩將方議未熟都監郭應起曰太尉決出此謀應  
願得善馬走德和軍招與俱來語未已平接之曰始議  
固在舍人呼軍吏出騎士百人從去應曰得百人不足  
為護徒自露耳彼知吾呼旁軍必出馬遮去路矣不如  
獨去便平曰獨去審易即有險欲誰倚邪應曰借令覆  
發得百人何可倚者請立表候日投午不來應死也太

尉毋相遲乃下令軍中皆完陣自固敢妄發一箭入敵  
師斬應從軍背出行十里許至德和軍軍聞應來白開  
壁欲內德和不肯促閉壁使卒將隔壁門問曰聞太尉  
已戰舍人宜身在行陣反西來欲西背與賊邪應收馬  
立陣外呼卒將前與語傳太尉令如此如此卒將還白  
之德和愕曰審如舍人語取符驗來應曰應為軍都監  
得親與議使應來正為信耳安須符太尉分軍時有符  
約邪曰無雖然吾專一軍來繫屬重其輕去就必得一



事可按乃去應辭索度德和畏避本不在符曰執應縛  
軍中見太尉一言不如令死此可不疑德和固怯聞敵  
大殊不敢去應連促數數度無以拒詆應曰天子取舍  
人勇當萬夫欲以備敵破堅使也顧乃受一騎任使欲  
避兵自完如何軍歸必以奏促先自去報太尉比軍隨  
至矣第戰無留待也應不敢止復馳還白德和語平等  
信以為德和審來即鼓起士戰連三北德和軍竟不來  
應獨出入行間軍稍却即覆馬以殿持大鐵稍橫突之

所當盡死呼入敵軍軍不敢視我師將整而止最後軍  
比時賊使人持大索立高處迎應下馬下輒為應所斷  
終不能得應因縱應深入鼓其旁曰急追漢兵留十餘  
弩連射應馬死步下行殺數人欲歸軍取馬軍已亂  
不得入乃脫身亡去士卒死者什八兩太尉失軍不還  
邊大警承受者馳二十驛比三晝夜至京師以聞已而  
賊遂收去敗兵散亡十餘日稍稍出邊旁諸郡負傷被  
創不及四萬獨德和一軍完天子使吏治德和以法死

天子思平等失援不救人人力死哀之下詔曰邊鄙有  
事卿大夫為朕率身戎行朕以不明信任失職使中人  
監軍卒敗邊事朕唯一二將帥失身鼓輦終無慰朕西  
顧惻惻之念其贈將佐已下官七遷若子若孫聽以父  
兄任為右職云郭應之亡也走東原伏大崖下士卒十  
餘輩與俱各解甲吮傷使一人下崖取雪手掬食之息  
樹旁良久望見敗馬行自取之棄士卒馳去促後卒皆  
呼曰舍人捨我徒邪應愈促馬顧謂趨還州來應及環

州自以失主將疑未敢見既而聞黃德和斬已從坐死者封遂匿山中而時時出部落乞食而子弟緣應故多得官任邊事王氏曰吾久聞郭應死客獨引延州卒言質之以語人人固不謂信然石元孫敗時而固已傳死前年賊歸元孫而元孫竟不死應其可知邪

臨淄尉考詞

黃庶

尉能捕盜使盜知不可免而不敢為盜亦去盜之一端也山東大約號多盜今臨淄獻一歲之狀視他縣者纔

幾人而已前件官為尉蓋有助云

汜水縣尉第一考詞

傅堯俞

夫尉職捕盜而賞罰最著唯用得失多少為差汜水縣前山溪而大河橫其後舊多椎埋為姦今周歲無盜非畏尉而不為乎顧不賢于得盜多者哉雖賞不及尚宜優其課等可考中上

濟源縣主簿呂師民考詞

傅堯俞

古者三載考績今則歲第之非責吏事嚴切謹密者哉

前件官兩會其課有勞無疵亦可謂勤吏矣可考中中

錄事參軍考詞

傅堯俞

紀綱掾地名右曹職典諸事竊比他局宜須得人前件  
官檢身廉平臨吏精敏載第其課衆謂為能固當少褒  
且勸不飭可考中中

道旁父老言

王令

道旁父老髯而黑瘠天甚寒衣破上而露下王子遇而  
嗟之父老曰小子何為嗟答曰翁老矣衣食不足以勝

寒飢筋力已疲不肖竊有志者故敢嗟父曰子來前吾  
語爾夫畜牛者求芻食犬者懷誼然則尸之者宜若然  
耶且不知吾輩又尸之誰也無乃亦宜馬牛其思歟答  
曰太平之世明天子在上四民各獲其利衣食所不及  
者游惰之民爾雖然翁胡為至是父曰天時連凶有田  
不足以償租賦子孫散去不能見保然則為老人者尚  
有罪邪謝之曰翁無多怨歲饑爾奈之何父怒曰饑何  
罪邪授人之羊匪牧是思十羊其來九皮而歸曰羊病

死奚救之非然則可乎小子未可與語也又何志之有  
邪投其杖而去追而謝之不復應

自訟

劉恕

平生有二十失佻易卞急遇事輒發狷介剛直忿不思  
難泥古非今不達時變疑滯少斷勞而無功高自標置  
擬倫勝己疾惡太甚不卹怨怒事上方簡御下苛察直  
語自信不遠嫌疑執守小節堅確不移求備於人不卹  
咎怨多言不中節高談無畔岸臧否品藻不掩人過惡



立事違衆好更革應事不揣已度德過望無紀交淺而  
言深戲謔不知止任性不避禍論議多譏刺臨事無機  
械行已無規矩人不忤已而隨衆毀譽事非禍患而憂  
虞太過以君子行義責望小人非惟二十失又有十八  
蔽言大而智小好謀而闊論劇談而不辨慎密而漏言  
尚風義而齷齪樂善而不能行與人和而好異議不畏  
彊禦而無勇不貪權利而好躁儉嗇而徒費欲速而遲  
鈍闇識而強料事非法家而深刻樂放縱而拘小禮易

樂而多憂畏動而惡靜多思而處事乖忤多疑而數為人所欺事往未嘗而不悔它日復然自咎自笑亦不自知其所以然也

東坡酒經

蘇軾

南方之氓以糯與粳雜以卉藥而為餅嗅之香嚼之辣揣之枵然而輕此餅之良者也吾始取麵而起肥之和之以薑液烝之使十裂繩穿而風戾之愈久而益悍此麵之精者也米五斗以為率而五分之為三斗者一為

五升者四三斗者以釀五升者以投三投而止尚有五升之贏也始釀以四兩之餅而每投以二兩之麴皆澤以少水取足以散解而勻停也釀者必甕按而井泓之三日而井溢此吾酒之萌也酒之始萌也甚烈而微苦三投而後平也凡餅烈而麴和投者必屢嘗而增損之以舌為權衡也既溢之三日乃投九日三投通十有五日後定也既定乃注以斗水凡水必熟而冷者也凡釀與投必寒之而後下此炎州之令也既水五日乃筭

得二斗有半此吾酒之正也先篲半日取所謂羸者為粥米一而水三之揉以餅麴凡四兩二物并也投之糟中熟攪而再釀之五日壓得斗有半此吾酒之少勁者也勁正合為四斗又五日而飲則和而力嚴而不猛也篲絕不旋踵而粥投之少留則糟枯中風而酒病也釀久者酒醇而豐速者反是故吾酒三十日而成也

述醫

龔鼎臣

周官載醫掌養萬民之疾病蓋凡受疾者舉可治也唯

久之不治遂革以死未見其有始疾而不可治者也巴  
楚之地俗信巫鬼實自古而然當五氣相沴或致癘疫  
之苦率以謂天時被是疾非醫藥所能攻故請禱鬼神  
無少暇鷄豚鴨羊之薦唯恐不豐迨其不能則莫不自  
咎事鬼神之未至或幸而愈乃曰由禱之勤也薦之數  
也不然烏能與天時抗乎又有治之不早其疾氣之毒  
日相熏灼一家之人皆至乎病故雖親友之厚百步之  
外不敢望其門廬以至得病之家懼相遷染子畏其父

婦避其夫若富財之人尚得一巫覡守之其窮賈者獨  
僵卧呻吟一室而已如是則不特絕醫藥之饋其飲食  
之給蓋亦闕如是以死者未嘗不十八九而民終不悟  
余嘗訪於人其患非它繇覡師之勝醫師耳嗚呼覡者  
豈能必勝諸醫哉其所勝之者蓋世俗之人易以邪惑  
也夫疾病干諸內神鬼冥諸外良藥所以治內也今不  
務除疾於內而專求外福之來及其甚也其存卹訊問  
之宜不復相通不其謬歟夫稼茂田疇為螟或所害唯

能悉除螟貳則稼之秀可實也家蓄奇貨而盜入其門  
主人操刃持挺或殺或捕則貲之厚可全也人之身亦  
然冒陰陽之氣輒遇癘疫當得醫者察聲視色按脈授  
藥使離諸腹心肝膈然後其體可平若不醫之用昌異  
不除螟貳而望稼穡之實不驅盜賊而求家貲之全決  
不可得矧惟國家重醫藥之書最為事要先朝編緝名  
方頒布天下郡國其間述時疫之狀實為纖悉及慶厯  
中范文正公建言俾自京師以逮四方學醫之人皆聚

而講習以精其術其黜庸謬救生靈倬然為治道之助而世俗罔識朝廷仁愛之意如此而徒惑邪誕而天性命愚實憫之今已戒醫博士日與醫之徒考神農子儀扁鵲秦和之術一會於岐伯俞跗之道以正絀邪以誠消妄使可治之疾不終害人亦濟民之一事也而慮已實之俗尚安故態不知醫効之神倍禱淫祀之鬼故刻詞以告嘉祐四年七月二十日述

吊鍾文

秦觀



嘉魚縣傍湖中比歲大旱水皆就涸而夜常有光怪赫  
然屬天鄉人相與誌其處而掘之得古罇鍾焉其形有  
兩轆如合兩瓦面左右九孔總三十六于鼓鉦舞銷衡  
旋幹之類考之不與合者無幾縣令施君識其寶謀獻  
之太常未果乃輸武昌庫中會其守解秩佐攝事見而  
惡之曰郡得背時器畜之不祥也亟命投於兵器之治  
嗚呼物之不幸有如是邪昔九江吏盜忠肅之碑材寘  
其所述歐陽詹聞而吊之以詞予悲夫罇鍾鼓樂之器

先王所以被功德而和人神審音之士至有振車鐸於空地而求之者非若九江碑材因人而貴也而辱於泥塗無所自効遇其非鑒以觸廢毀好古之士焉得默默而已乎乃作文以吊之詞曰嗚呼衆方之生謬形殊罷更首迭尾雌雄相廢朝為美姬夕為焦萃或奇偶之相續或九升而一躓清餓和黜刑王眇貴生犢失明得駿折髀洞所遇之參差莽循還於一氣傳曰黃鍾毀棄瓦缶雷鳴余始以為不然今乃信之矣嗚呼罇鍾何世所

為質不呈剛形不露奇協律中度渾如天資掩抑雖久  
不見瑕疵爰有兩樂三十六孔厥音琅然小大隨叩曷  
所挺之瓌偉而偶沉於幽陋辱泥塗之污漫厭鱗鬣之  
腥臭嗟筍簾之一辭遽月宏之幾設幸陽愆而水涸天  
日恍其復覲謂庭貢之是克獲効鳴於金奏何夜光之  
暗投卒按劍而莫售嗚呼赤刀大訓天球河圖秦璽漢  
劍趙璧隋珠捷為之磬汾陽之鼎曲阜之履大澤之孤  
厯世相傳以華國都下至威斗錯刀羯鼓之棧破鏡缺

符遺簪墮珥信無益於經綸猶見收於好事是鍾也郊  
廟所薦樂之紀綱統和元氣舞獸儀鳳令大河而更清  
使左角其不芒變化風俗返乎羲皇而乃廢於深淵出  
而遇毀殆藻盤之不如矧牛鐸之敢企此義夫志士所  
為疾心而切齒也然余聞之陰精之純燥氣之裔雖從  
火革其質不變一晦一明昔者既然僨而復起可無畢  
乎嗚呼鍾乎今焉在乎豈復為激宮流羽以嗣其故乎  
將憑化而遷改服易制以周於用乎豈為錢為鐻為鉦

為釜以供耕稼之職將為鼎鬲以効烹飪之功乎豈為  
浮圖老子之像巍然瞻仰於緇素乎豈為麟趾褭蹄之  
形翕然玩於邦國乎豈為干越之劍氣如虹霓掃除妖  
氛於指顧之間乎將為百鍊之鑑湛如止水別妍醜於  
高堂之上乎新故相代未始云畢紛然殊途必有一出  
決不泯沒草亡木卒嗚呼鑄鍾又將奚卹

責沈文貽知默姪

陳 璿

適越而北轅越不可至徙越人而置於齊里則越語可

易而為齊然而氣質一定而不能自易其習者非以其  
不學歟氣質之用狹道學之力大習其所自習者未嘗  
察也天氣而地質無物不然人貌乎其間亦一物耳物  
與物奚以相遠或哲或愚不係其習乎思誠之道莫先  
於學務學之要在於求師顏子之不遷不貳得於孔子  
晞顏之人將孰師焉葉公問孔子於子路子路不對夫  
葉公有知人之明有謀國之忠愛賢而得民慎微而憂  
遠其事皆有可指其遺語之記於緇衣者亦可觀焉楚

國之賢誰出其右子路非慢賢者也魯有尼而彼不知  
焉則於其間也何足對哉陳良楚產也而能使北方之學  
者莫或先之故孟子以良為豪傑之士為其能悅周公  
孔子之道而已不知仲尼則雖賢如子高亦孔門之所  
不對也為士而稽古者可不鑑哉予元豐乙丑夏為禮  
部貢院點檢官適與校書郎范公醇夫同舍公嘗論顏  
子之不遷不貳惟伯淳有之予問公曰伯淳誰也公默  
然久之曰不知有程伯淳耶予謝曰生長東南實未知

也時予年二十有九矣自是以來常以寡陋自愧得其傳者如楊中立先生亦未之識也崇寧之初兄孫漸就學其門時予在合浦始獲通問予之內訟改過賴其一言漸於是時亦以所聞警予之繆予始忽其言久而後知其為藥石也今漸來天台考其學益進聞其言益可喜陶染薰鑄有自來矣舉修步於南溟觀洪濶於北壑此可遠之基也始之不謀何以得此古之善學者心遠而莫禦然後氣融而無間物格而不二然後養熟而道



凝山上有木其進也漸合抱之幹豈一朝一夕之所可俟哉人之患在不立其基基立而不勉亦何以愈於彼乎物之終始可不嚴哉始識而終成同乎一默非言語所能究也予以多言取禍尚未誅殛戴恩自幸不知歲月之久而生死之有二也既老且病手痺目昏簡編筆硯殆將捐棄今於漸之行不能忘言作責沈以貽之喜漸之能謀其始而篤之使有成也政和三年八月九日

宋文鑑卷一百二十七

欽定四庫全書

宋文鑑卷一百二十八

宋 呂祖謙 編

對問

應責

柳 開

或責曰子處今之世好古文與古人之道其不思乎苟思之則子胡能食乎粟衣乎帛安于衆哉衆人所鄙賤之子猶貴尚之孰從之子化也忽焉將見子窮餓而死

矣柳子應之曰於乎天生德于人聖賢異代而同出其出之也豈以汲汲于富貴私豐於己之身也將以區區於仁義公行于古之道也已身之不足道之足何患乎不足道之不足身之足則孰與足今之世與古之世同矣今之人與古之人亦同矣古之教民以道德仁義今之教亦以道德仁義是今與古胡有異哉古之教民者得其位則以言化之是得其言也衆從之矣不得其位則以書于後傳授其人俾知聖人之道易行尊君敬長

孝乎父慈乎子大哉斯道也非吾一人之私者也天下之至公者也是吾行之豈有過哉且吾今棲棲草野位不及身將已言化于人胡後于吾矣故吾有書自廣亦將以傳授於人也子責我以好古文子之言何謂為古文古文者非在辭澁言苦使人難讀誦之在于古其理高其意隨言短長應變作制同古人之行事是謂古文也子不能味吾書取吾意今而視之今而誦之不以古道觀吾心不以古道觀吾志吾文無過矣吾若從世之文

也安可垂教于民哉亦自愧于心矣欲行古人之道反類今人之文譬乎遊于海者乘之以驥可乎哉苟不可則吾從於古文吾以此道化於民若鳴金石于宮中衆且曰絲竹之音也則以金石而聽之矣食乎粟衣乎帛何不能於衆哉苟不從於吾非吾不幸也是衆人之不幸也吾非以衆人之不幸易我之幸乎縱吾窮餓而死死則死矣吾之道豈能窮餓而死之哉吾之道孔子孟軻楊雄韓愈之道吾之文孔子孟軻楊雄韓愈之文也

予不思其言而妄責于我責于我也即可矣責于吾之  
丈吾之道也即予為我罪人乎

答客問

尹源

客謂予曰敢問人臣不忠孰為大曰無過為大客曰過  
之為言失中之謂也為臣有是則悖於事而害於治君  
子善於無過而子以為不忠惑矣曰余所謂無過者非  
果能無過衆人不以為過無跡可攻也何則自古人臣  
為不忠者未有不外示畏謹循法度而能固其寵久其

權以遂其邪者內則為宰相為卿大夫不敢主天下事  
與進退賢不肖曰吾知循故事爾專則罪也外則為郡  
為邑以至廉察一道視政之弊不敢革視民之疾不敢  
去曰吾知奉法爾違乃辟也若此者不惟時君以後無  
過天下之人亦以為無過苟終不能辨之使內外相濟  
以成其俗則國日削民日敝以至大亂而莫之禦謂之  
忠可乎忠臣則不然一心公平天下不以身之安危易  
其守其行事也或犯上之忌或冒下之謗若此者不惟



時君以為過天下之人亦以為過矣苟能辨之使得行其道則國享其利民被其賜謂之不忠可乎故忠臣本於愛君奸臣本於愛身未有愛君而先其身愛身而先其君者客曰如子之說仲山甫明哲保身萬石君崔光忠謹無過皆不忠乎曰若數子皆純乎其中非求無過之名以為已利故忠臣之過小而必形奸臣之過大而不章世人徒見其形者以為過也孔光張禹所以危漢宗林甫所以禍唐室曰然則人君何以辨之曰捨其迹而

責其心術斯得矣

諭客

劉敞

寶元康定之間元昊畔詔書求材謀之士於是言事自薦者甚衆輒下近臣問狀高者除郡從事其次補掾史且數百人時予方遊吳中客有相哀者作諭客客謂公是先生曰蓋聞賢者不遺利智者不失時因形推勢以事為機是以功勲流於竹帛盛德載於黎庶歷百世而不衰掩衆人以獨驚此所謂豪傑之士也而先生亦有

意於此乎先生曰何以教之客曰今西兵距境崑崙道  
絕主上不怡邇有宿甲旃裘之貢不入鍾鼓之娛不勸  
者于今三年矣是以下求賢之詔開自薦之路總擊奇  
俊兼聽天下恩涵於人心義激於肺腑故令下之日坐  
者泣沾襟卧者涕交頤咸欲奮必死之力蹈難測之機  
忘山川之苦薄戰伐之危請長纓以繫頸輸家財以濟  
師拜章者交乎公車獻策者滿乎北闕起徒步以析爵  
由一言以改列此亦遭遇之時變化之契勇辯之辰敵

國之勢穰苴所以權軍而西出蘇秦所以掉舌而東逝也今先生乃悄乎如不知貌乎如不聞名與智寂迹與世淪懷書滿腹不如衆人意者暗於事勢而然乎且夫道期於用不必全潔功期於成不必無辱是以伊尹負鼎伍員鼓腹百里食牛包胥慟哭乘時因勢大直細曲崇如丘山炳若執燭今先生乃獨習無用之言守難行之事遺棄諸子專意六藝井田雖通不可以厚財賦之入鄉飲雖講不可以助軍旅之急羽舞雖文不可以代干

戟之執旄冕雖純不可以更甲冑之襲睢盱拳曲空言  
少實不可圖進取之益則何不卑論儕俗夜寢夙興馳  
騁乎孫吳之場揣摩乎蘇張之營舌如電流功如雷行  
威名並建家國兩榮乃反侈陋巷之處甘藜藿之食目  
無韶曼耳絕金石抱甕而汲不知用力行身若此老且  
奚益先生曰吁客何貌之壯而語之少何願之大而智  
之小信難以議道矣雖然不可以不陳也昔者軒有版  
泉之師堯有丹浦之征舜有三苗之誅啓有扈氏之兵

成湯造攻於牧宮文王收績於崇城當此之時覆載侔  
於天地文明比於日月休恩滲於時雨厲威絜於霜雪  
跛行喙息罔有不服然且干戈未盡戢弓矢未盡閉小  
至俘馘大至流血巍巍之功不為之差滅赫赫之號不  
為之滅裂適足以增其徽名廣其休烈而已客以謂有  
損於盛德邪夫狂童鴟張天奪其魄跳踉顛危假命頃  
刻親戚不言思得所殛狗吠其主鼠竊疆場此亦蚩尤  
三苗何以異哉然而將帥之臣閱於詩禮介冑之卒奮

於驅兕賞未及懸刑未及峻而天下之民億兆之衆固  
已集矣於是乎虎眄鷹眎龍行雲起譬若挽千石之弩  
決垂潰之疽引洪河之流沃殆滅之燬曾不移息而可  
見又何足煩天下之學士主上所以乾乾夕惕勞於求  
賢通自進之路開博訪之門者恐伯高傳說之流藏於  
巖野伊尹大師之品逸於屠釣又所以明謙讓之義恭  
聽卑之操使非常之業與士大夫共有也此乃三王所  
不及五帝所難行愚陋之人豈能昭見其情哉昔燕欲

駿馬乃市朽骨而千里之駒果至越欲勇士乃揖怒螳  
而百夫之勇來萃主上亦欲致特達之人是以狂狷者  
無所拂排觸者無所忌高爵重祿或富或貴鑒洞乎神  
明量配乎天地豈以為小醜之未夷羣兇之尚恣哉且  
夫東漸島夷南及交趾西奄孤竹北越鑿齒受令朝朔  
齊一車軌雷動風行方百萬里觀數郡之地元昊之衆  
曾不若黑子之著而蟻之循穴而欲以敵國論之固失  
類矣且客獨不聞宋受命之說乎昔者唐失其御海水



橫溢寰宇之內分為六七不貢不朝靡所統一於是蠡  
蠡之氓困於戈鋌積尸為山流血成川靡潰屠剥者蓋五  
十餘年上帝眷之乃命太祖受禪啓國方行千里猶有  
殘孽弗率弗祀太宗平之真宗成之至於制作之道以  
或未遑然亦開籍田封太山禮河汾考百王皇上率循  
聖武靡有遺軼而勝殘去殺適底今日是以往者申訪  
古樂緒正郊配大定六籍謹敕元會欲以就一王之法  
成必世之期使後嗣遵其矩太常肆其儀參於六經表

於萬年澤漏於重溟功陟乎上天還成康之俗儷典謨  
之篇包弓偃革無得踰焉此學者所以踴躍而鄙儒所  
以拳拳也何以蘇張於平世孫吳於異類終無益於王  
道空自絕於聖治客徒笑我暗於事機我亦悲客躁於  
富貴而不知制作之義也言未畢客竦而謝曰荒野之  
人溺於所聞先生幸教之謹受令矣

反求齋對

謝逸

李子作齋於廳事之北求名於余其名曰反求李子請

曰願聞反求之義對曰子不聞楚國之盜者乎楚之盜  
曰支貢者行若無迹語若無息踰垣若鳥穴土若鼠居  
於楚國人無夜不亡其物焉國人心知其貢也而執之  
無狀每亡物必罵曰是必貢也其如不可執何居一日  
貢語其隣之子曰楚之盜不為寡矣每亡物必尤貢也  
何隣之子曰子無怒國人之尤已也子能為盜故亡物  
者必尤子子而不為盜其誰尤子哉貢曰是不難也吾  
且闔戶不出矣儻夜有亡物者亦將以尤貢可乎是夜

楚人徹衛釋禁而國中無犬吠之驚君子曰人不可不  
反求諸己也仁所以愛人者也愛人不親則反諸己曰  
仁未至也智所以治人者也治人不治則反諸己曰智未至  
也敬所以禮人者也禮人不答則反諸己曰敬未至也  
行有不得者皆反求諸己而惟人之責則與楚之盜日  
攘其物而怒人之尤己也何異哉反求之義其在斯乎  
李子憮然為間曰命之矣李子名紱字明服余表弟也  
又從余故告之以名齋之義使歸而書諸壁焉

三山移文

宋 白

三山之英十洲之靈排烟拂霧勒移山庭夫以逍遙玄  
俗之姿縹緲飛仙之狀控白鶴於雲末騁青鸞於天上  
吾方知之矣若其冥冥帝先杳杳象外厭浮世而龍攄  
曳天倪而蟬蛻聆白雪於太虛挹流霞於上界因亦有  
焉豈其侈靡輕浮猖狂迅速習夏癸之奢用商辛之酷  
將大道以為戲勦萬民而逞欲何其謬哉嗚呼龍馭不  
存鼎湖長往萬古千秋英靈盼蠻世有秦皇爰及漢帝

既崇登高益驕益熾然而貌學希夷情忘橐籥竊祀神  
山濫封東嶽汗吾真風輕吾上藥雖篤志於仙林竟無  
心於天爵其始至也將拍洪崖挹浮丘捐百揆棄諸侯  
竈梁架日劍氣凌秋或思玉皇可接或憶金仙共遊廢  
元元以不治仰蒼蒼而是求燕昭何足比子晉不能儔  
及其妄說斯行貪誠彌勇智刃揮霍靈臺飛動乃闔意  
海隅窮奢世上汎樓船而濟重溟建祈年而侔大壯蘭  
橈馥其天風桂棟凌乎辰象望仙闕而何極顧入窠而

如喪至其儼霞冠垂珠綬履鳳文之鳥列蛟龍之繡焚  
百和於筵上輝九華於坐右羽旆爭聳瑤壇競開丹臺  
紫府在何處白鳳青鸞猶未來大寶非貴三清是屬恥  
萬機之瑣屑隘六合之局促將紀號於真圖任銷聲於  
帝籙希風七十君委政三十穀使我徒費步虛嘗輕舉  
徐福不歸安期誰侶文成五利並虛詞太一上元徒延  
佇至於栢梁灰燼承露飄零甲帳空兮暮烟怨羽人去  
兮秋風驚昔求長生躋壽域今見委骨在窮塵是知碧

海汪洋瀛洲浩渺方丈爭奇蓬萊竦峭慨沙丘之云云  
悲茂陵而誰弔故其露慘長寒風啼自咽秋草淒涼春  
花愁絕嗟羅綺之皆空嘆池臺之已滅且夫奄有神器  
化育羣生將天地以合德與日月而齊明豈可使鳳宸  
寂寥龍圖銷毀帝道荒蕪天潢泥滓遊心於幻路教臣  
民而以詭宜局玉洞掩天關揚大霧湧驚湍陽祇風於  
海上杜妄魄於雲端於是瞋波如山怒雲寡色斥二主  
之訛謬警後王之道德請為治世君無俟賓天客



跋奚移文

黃庭堅

女弟阿通歸李安詩為置婢無所得乃得跋奚蹢躅離  
疏不利走趨顙出屋檐足達戶樞三嫗挽不來兩嫗推  
不去主人不悅厨人罵怒黃子笑之曰堯牽羊而舜鞭  
之羊不得食堯舜俱疲百羊在谷牧一童子草露晞而  
出草露降而歸不亡一羊在其指撝故曰使人也罷之  
物有所不可則亦有所宜警夜偷者不以馬司晝漏者  
不以鷄準繩規矩異用殊施天傾西北地缺東南尺有所

不逮寸有所罅子不通之則屨不可運土簣不可當屨  
坐而睨之小大俱廢子如通之則瞽者之耳聾者之目  
絕利一源收功十百事固有精於一則盡善徧用智則  
無功有所不能乃有所大能焉呼跛奚來前吾為若詔  
之汝能與壯士拔距乎能與羣狙賦茅乎能與八駿取  
路乎能逐三窟狡兔乎皆曰不能曰是固不能閨門之  
內固無所事此今將詔若可為者汝無狀於行當任坐  
作不得頑癡自令謹飭晨入庖舍滌鎗淪釜料簡蔬茹

留精黜脩饈肉法欲方膾魚法欲長起漉如截肪煮餅  
深注湯和糜勿投醯醢白晚用薑葱溲不欲焦旋菹不  
欲黃飯不欲著牙揚盆勿駐沙進火守蛙水沃沸鼎斟  
酌薌笔生熟必告媿媿臨食爬垢撩髮染指舐杓嚼齧  
懷骨事無小大盡當闕白食了滌器三正三反拭拭蠲  
潔寢是覆枕陶瓦髹素視在謹數兄弟為行壯北相當日  
中事閒浣衣漱襦器穢器淨謹循其初素衣當白染衣  
增色梔鬱為黃紅螺蚶光按藍杆草茅菟橐皂漿胰粉

白無不媚好燥濕處亭尉帖坦平來往之役資它使令  
牛羊下來喚鷄棲桀撐拒門闔間護草竊飲飯猫犬埋  
塞鼠穴凡鳥攫肉猫觸鼎犬舐鎗鼠窺甑皆汝之罪也  
春蠶三卧升簇自裹七晝七夜無得停火紵麻藤葛蕉  
任締綌錫踈手作無有停時紵緝偷工夫一日得半工  
一纓亦有餘暑時蘊蒸扇涼蜜水薰艾出蚊水盤去蠅  
果生守樹果熟守筩執弓懷彈驅嚇飛鳥無得吮嘗日  
使殘少姆嫗罵譏虐痢泄嘔天寒置籠衣食畢烘搔痒

抑痛炙手擱凍無事倚牆鞢履可作堂上叫呼傳聲代  
諾截長續短鳬鶴皆憂持勤補拙與巧者儔凡前之為  
汝能之不跛奚對曰我缺於足猶全於手如前之為雖  
勞何咎黃子曰若是則不既有用矣乎皆應曰然無不  
意滿

連珠

連珠二首

徐鉉

道不可以權行終則道喪情不可以苟合久則情疎是

以兵諫愛君君安而忠敬已失同舟濟險險夷而取授  
自殊

運不常偶體道者無憂時不常來抱器者無滯是以霜  
露既降徂來不易其貞弓矢載櫜董澤不踰其利

連珠一首

晏殊

時平德合秉均者續隱於幾先運極道消享位者譽隆  
於事外是以房杜之恩勤莫二無迹可尋郭裴之退黜  
居多其名益大

郭汾陽裴  
晉公也

連珠一首

宋庠

山有梗梓之材居山芟草而舍田有禾稷之實力田者  
半菽而飽廐有驥驟之乘掌廐者羸股而步此所謂役  
於物者智不建乎物也無木者有華榱之蔭無田者有  
嘉穀之享無廐者有上駟之御此所謂役物者智包乎  
物也故君子逸於用德小人勞於用力

連珠一首

劉攽

蓋聞詭道取勝得以暫用懷惡致討未有能克是故以

禁詐禁可容於徼幸用燕伐燕不足以相服

宋文鑑卷一百二十八



欽定四庫全書

宋文鑑卷一百二十九

宋 呂祖謙 編

琴操

懷歸操

劉 敞

蟋蟀在堂歲云除今我不樂鬱以紆豈不懷歸畏簡書  
蟋蟀在堂歲云逝今我不樂濡以滯豈不懷歸友朋畏

醉翁操

蘇 軾

琅邪幽谷山水奇麗泉鳴空澗若中音會醉翁喜之把  
酒臨聽輒欣然忘歸旣去十餘年而好奇之士沈遵聞  
之往遊以琴寫其聲曰醉翁操節奏疎實而音指華暢  
知琴者以爲絕倫然有其聲而無其辭翁雖爲作歌而  
與琴聲不合又依楚詞作醉翁引好事者亦倚其詞以  
製曲雖粗合均度而琴聲爲詞所繩約非天成也後三  
十餘年翁旣捐館舍而遵亦沒久矣有廬山玉澗道人  
崔閑特妙於琴恨此曲之無詞乃譜其聲而請於東坡

居士以補之云

琅然清圓誰彈響應空山無言惟翁醉中知其天月明

風露娟娟人未眠荷蕢過山前曰有心也哉此賢

泛聲同此

醉翁嘯詠聲和流泉醉翁去後空有朝吟夜怨山有時  
而童顛水有時而田園思翁無歲年翁今爲飛仙此意  
在人間試聽徽外三兩弦

於忽操

王令

劉表見龐公將起之而公不願也表曰然則何謂公曰

我可歌乎既歌命子絃之凡三操

於忽乎不可以爲其又奚爲離婁之精夜何有於明瞽

曠之耳聾者亦有耳

一本作塞何有於聲

東王良之手兮後車載

之前行險以既覆兮後逐逐其猶來雖目盼而心駭兮

顧其能之安施委墨繩以聽人兮雖班輸亦奚以爲

於忽乎不可以爲其又奚爲椽櫨桷榱之累重顧柱小之

奈何方風雨之晦陰行者艱而莫休居者坐以笑歌不

知塵之忽然兮其誰安何

於忽乎不可以為其又奚為謂雞斯飛誰得之吾方饑而羈謂豕斯突何取於縛是皆以食而得之吾方饑而後噫噫雞豕兮死以是兮

晝操

孟子去齊舍於晝作

林希

彼滔滔之天下余孰從而與歸來何其然兮其去何為吾行或使矣止或居之母嗟吾行矣於此遲遲棄其量鬴兮禽撮安施釣石則委兮亦何用於銖紱顧瞻咨嗟今人曷余疑嗚呼余歸兮已而已而

上梁文

開封府上梁文

楊億

受三靈之眷命開百世之丕基居中土以制四方坐明  
堂而朝萬國上觀玄象設路寢而闢應門下鑒黃圖定  
神州而分赤縣玉帛駿奔而荐至舟車輻湊以交馳居  
民最處於浩穰寰宇共瞻於表式法天崇道皇帝陛下  
道光上聖仁洽普天性堯舜之聰明體禹湯之勤儉垂  
衣裳而布政懸法象以授人旰食視朝俾精求於理本

臨軒遣使常散採於民謠物情而煦育如春王道而坦  
平若砥故得五兵不試邊陲無金革之聲四序由康隴  
畝起倉箱之詠敦淳反朴黎民盡致於可封獻賁輸琛  
異域曾無於後至混車書而一統頒正朔於四夷十年  
遠過於成周拓土更逾於彊漢乃眷京畿之千里旁連  
魏闕之九重包括諸華儀刑列郡疆理既推於廣斥閭  
閻最號於便蕃豈惟狹少之場所謂帝王之宅爰求控  
壓實在元良皇太子道契黃離位隆蒼震問安視膳素

彰周寢之勤主鬯承祧爰踐漢儲之貴自春宮而育德  
鎮天邑以分憂誕揚慈惠之風廣布神明之政綠林屏  
息絕吠犬以堪驚玉燭勻調無喘牛而可問於是決斷  
簿書之暇經營土木之功廣棟宇之新規集班輸之絕  
藝揮斤者成市荷鍤者如雲度榱桷杞梓之材召丹雘  
圻墁之匠百堵皆作不日而成梁橫蟠螭以蜿蜒瓦疊  
駕鶩而迤邐堂皇有煒廳事斯嚴廊回合以四周庭清  
虛而中啟制度迭彰於壯麗形容備極於巍峩足以明



東朝副貳之尊表南府鎮臨之盛兒郎偉今茲吉日將  
畢奇功爰自拋梁式申犒勞散金錢而滿地堆餅餌以  
如山卮酒疏肩盈樽滿案極量而飲應不羨於單醪實  
腹而食固如填於巨壑既醉以飽式舞且歌同承渙汗  
之恩共樂昇平之化

拋梁東三韓百濟慕華風毛車遠涉浮天浪歡呼鼓舞  
未央宮

拋梁西雪嶺金河路不迷萬里玉關皆我土葡萄首藉

徧高低

拋梁南跼鳶浪泊聖恩覃大貝明珠盈帑藏崔嵬銅柱拂煙嵐

拋梁北匈奴逃遁空沙磧茫茫絕漠胡無人侍上陰山重刻石

拋梁上非煙顯氣何蕭爽歷歷天邊種白榆亭亭雲際栽仙掌

拋梁下萬井繁華堪大詫家家樓閣倚晴空處處絃歌

樂皇化

伏願拋梁已後風調雨順時和年豐聖壽靈長與大椿  
而難老邦家鞏固將磐石以無窮少海長浮於厚載前星  
永耀於玄穹濟濟宮庭之僚屬森森天府之賓從盡預  
商山之羽翼咸依儉幕之芙蓉將吏奔趨而有幸軍民  
撫育以皆同悉傾心而奉上並竭節以向公路絕冠攘  
夜戶而從茲不閉人無爭訟圉靡而自此常空百姓咸  
躋於壽域八方悉被於仁風然後我皇帝之千秋萬歲

長端拱以居中

英宗殿上梁文

王安石

天都左界帝室中經誕惟僊聖之祠夙有神靈之宅嗣  
開宏筴追奉睟容方將廣舜孝於無窮豈特尚漢儀之  
有舊先皇帝道該五泰德貫三儀文摛雲漢之章武布  
風霆之號華夏歸仁而砥屬蠻夷馳義以駿奔清蹕甫  
傳靈輿忽往超然姑射山無一物之疵邈矣壽丘臺有  
萬人之畏已葵鼎湖之弓劍將游高廟之衣冠今皇帝

孝奉神明恩涵動植纂禹之服期成萬世之功見堯於  
羹未改三年之政乃眷重修之吉壤載營館御之新宮  
考協前藝述追先志孝嚴列峙寢門可象於平居廣拓  
旁開輦路故存於陳迹官師肅給斤築隆施揆吉日以  
庀徒舉修梁而考室敢申善頌以相歡謠

兒郎偉拋梁東聖主迎陽坐禁中明似九天昇曉日思  
如萬國轉春風

兒郎偉拋梁西瀚海兵銷太白低王母玉鑲方自執大

宛金馬不須齋

兒郎偉拋梁南丙地星高每歲占千障滅烽聞嶺徼萬艘輸糴引江潭

兒郎偉拋梁北邊頭自此無鳴鏑即看呼韓渭上朝休誇竇憲燕然勒

兒郎偉拋梁上彷彿神游今可想風馬雲車世世來金輿玉笋年年往

兒郎偉拋梁下萬靈隕祉扶宗社天垂嘉種已豐年地

產珍符方極化

伏願上梁之後聖躬樂豫寶命靈長松茂獻兩宮之壽  
椒繁占六寢之祥宗室蕃維之彥朝廷表幹之良家傳  
慶譽代襲龍光肩一心而顯相保鑣祝之無疆

披雲樓上梁文

陳履常

夙夜在宮必有燕休之地上下同樂孰知興作之勤惟  
此東州稱為輔郡遺澤未息猶有陶虞之風王化既成  
更同齊魯之俗河山千里枹鼓不鳴閭巷百年豪傑間

出地滋墾闢歲嗣豐穰里無愁嘆之聲吏絕追呼之擾  
因斯時之暇豫樂此地之登臨草故增高事非過制斷  
長續短費不及民棟宇靚深稱吏民之觀望歲時遊豫  
遂老幼之歡娛爰歷靈辰用興危架聽於輿頌落此成  
功

拋梁東日上雲開四顧中今代功名歸二老當年富貴  
有朱公

拋梁南舳艫銜尾繫江潭朝隣已作豐年雨暑飲行聽



抵掌談

拋梁西陰陰桃李下成蹊舉頭更覺長安近送日長隨落日低

拋梁北瑞塔亭亭入雲直百年戰鬪及明時千里河山餘故國

拋梁上危架宮堯逮千丈房心瑞璣近簷楹海岱摧藏但空曠

拋梁下割肉成堆酒如瀉燕雀投人也自忙鼠蝠旋墻

不容罅

伏願上梁以後人神同力暘雨以時水宿塗行夜無風  
露之警盆縲鍊割家有囊廩之餘囹圄一空鞭笞不試  
商旅四集貨賄遂通據榻以談不減庾公之興從遊而  
賦尚須韓子之文

書判

辛捕罪人丁過而不救辭云家有急事救療

余靖

逋播未播宜同掩襲彌留待救安可遭廻苟或責其容  
姦姑合先於拯患辛事當祇役職在追逃力而拘之饑  
鷹之効未展勢不足者因獸之鬪方勞眷彼遵塗之人  
式冀執兵之助備其越逸此望惠然肯來憂在族姻彼  
乃往而不返誠或慮其飾詐謀合原其執心網恐論於  
吞舟固宜并力病方深於易箠安得忘情徒欲詰其圖  
全未可罪其為已囚其亡命雖追捕以攸先人各有親  
當患難而自救縱云行邁殊匪坐觀捕逃之黨未除遽

令謫我瞑眩之求不濟則欲怒誰職且異於追胥罰難  
加於行路是則彼有詞矣姑合宥而捨之

丙越度官府垣籬官司罪之辭云隨甲而往

余靖

協謀抵禁法有減論冒度干刑理無從坐既投足而同  
往豈原心而或殊丙德之弗修動而有悔不如已者方  
踰數仞之墻因而從之遂罹三尺之法自踈明慎猶啟  
薄言况穴隙以相從惟蕝茨而自履前王著令徒攀共

犯之條君子嚮儒盡守獨行之節矧府寺之攸設惟藩  
屏而是崇不得其門同臨蔽惡之地必求諸道當懸由徑  
之非雖曰比之匪人實亦動而過則原其發慮遽云職  
汝之由詳彼治躬豈可効人之僻咎將誰執戚實已招  
視籬落之具存當跬步而為過別冒漢家之網或異首  
科自絕蒲人之祛諒難降等三千之條備紀七十之杖  
何逃罪必甘心詞奚苦訴

丙為左僕射門立榮戟其子封國公復請立戟儀曹

不許

余靖

位賡王爵固有彝儀名列子倫所宜降禮既高閣之共  
處豈列戟以重施丙鵠印傳家蟬聯襲寵斗樞踰貴既  
升八座之榮社土啟封遂及一經之嗣胡為令子罔達  
宏規以謂秩視諸公幸列分茅之位勲崇三品請頒立  
槩之儀展矣攸司詳夫大體且乘軒服冕雖同列國之  
權問寢趨庭豈有異門之制縱未該於令式宜必叶於  
謀猷況乎尊有壓卑之文備存典冊子存避父之禮綽

著章程國有大焉古之道也恩榮沓至任旌高穎之勲  
制度問愆宜喜柳或之見必當固執無謂他規戴記傳  
芳車馬猶稱於不及隋書勸善榮戟寧聞於再頒必採  
禮卿之詞勿貽侯氏之過

乙夜居於外丙往弔之或責其非

余靖

宴安有度式貴慎儀出處無容固宜行弔既自愆於所  
止亦何怒於相隨乙德之不修動而有悔安身克謹當

從嫡寢之間居外尤非自比遭喪之變眷惟益友深達  
彞章朝夕四時既失常於訪問吉凶五禮遂矯辭於禍  
災縱未盡於嫌疑抑已陳於規誨進退可度燕衣將亂  
於悲哀居處以莊環經何慙於諷刺爾惟失節我豈廢  
言所期克舉其儀孰謂不知而作衣服宮室雖弗襲於  
纓裳揖讓周旋固可譏於牀第理既同於事死問乃比  
於知生況彰終夕之嫌復異致齋之制改容並進雖興  
言偃之非問疾同辭宜守仲尼之訓弔之可也人其謂



何

乙為政請隳都城譏其無備辭云都城不過百雉

余靖

政在保民固宜多備城苟過制何謂弱枝爰啟見機之  
謀當許復隍之請乙器能高世忠亮拔羣方推許國之  
忠遽展濟時之略以謂金湯作固誠多藩屏之功控帶  
相高必啟寇戎之害式陳良算允叶明謀庇民無假於  
深池頽墻願填於濬洫且赫連定霸雖增蒸土之勞士

爲知權寧慎實薪之役深詳得失妙察興衰縱墨翟多能九攻聞解帶之術而鄭丹遠識五大在邊之譏蓋虞乎讐必保焉盍循乎古之制也今京不度在百雉以貽憂夫魯有初諒三都之必毀允合仲尼之志何慙由也之忠

丁去官而受舊屬饋與或告其違法訴云家口已

離本任

余靖

食牒養廉執心斯可及公受代改操則非安得因其去

官遂不思於潔已丁也才高有立秩滿將遷飛鳳銜書  
亦既榮於寵命解龜罷政遂靡讓於好羞謂行邁之有  
期曾厭私而不懼況古之循吏名列青編挂府丞之魚  
誠在涖官之日留壽春之犢實惟去任之晨何乃肆貪  
罔知守節歌鄧侯之五鼓曾是遵途特山陰之一錢當  
思勵俗徒欣苟得豈曰能謀重耳受殄蓋當於旅食叔  
魚反錦益愧於公行如云不爾瑕疵則恐罔知紀極推  
恩布化未聞畫象之遺風黷貨啟奸遽恣貪狼之本性縱

離境壤終喪庶隅減三等以定刑乃九章之垂統

甲為縣令士乙與其故人丙醉歐乙乙詣縣訟丙  
令問曰傷乎曰無傷也相識乎曰故人三十年  
矣嘗相失乎曰未也何謂而歐汝乎曰醉也解  
之使去有司劾甲故出丙罪甲曰闕不致傷敕  
許在村了奪耆長則可縣令顧不可乎

王 回

令親民而毆之於善者也士所以學為君子也今釋一

醉念相歐咎四十之過全其三十年間未嘗相失之交  
歐民於善而責士以君子之道者也仲尼為魯司寇赦  
父子之訟漢馮朝韓延壽不肯決昆弟之爭篤於親而  
故舊不遺其義益一耳甲之所為於古為能教於今為  
應法不可劾

甲為出妻已告其在家嘗出不遜語指斥乘輿有  
司言雖出妻而所告者未出時事也或疑薄君臣  
之禮隆夫婦之恩律不應輕

王 回

指斥乘輿臣民之大禁至死者斬而旁知不告者猶得  
徒一年半所以申天子之尊於海內使雖遐邇幽陋之  
俗猶無敢竊言訕侮者然書稱商周之盛王聞小人怨  
罵乃皇自敬德不以風俗既美而臣民儼然戴上不待刑  
也則此律所禁蓋出於秦漢之苛耳若妻為夫服斬衰  
而降其義甚重傳禮已來未之有改也且挾虐犯法既  
許自訴而七出義絕和離之類豈有穴怨顧恬然藉社

席之所知喜為路人擠之死地其惡慙矣宜如有司所  
論已若夫減所告罪一等甲缺首以律附經竊謂非  
薄君臣之禮而隆夫婦之缺



宋文鑑卷一百二十九



欽定四庫全書

集部  
宋文鑑卷一百一十一

詳校官監察御史<sub>臣</sub>周元良

助教<sub>臣</sub>常循覆勘

總校官降調編修<sub>臣</sub>倉聖脉

校對官中書<sub>臣</sub>李荃

謄錄監生<sub>臣</sub>楊遜齡

欽定四庫全書

宋文鑑卷一百三十

宋 呂祖謙 編

題跋

跋放生池碑

歐陽修

右放生池碑不著書撰人名氏放生池唐世處處有之  
王者仁澤及於草木昆蟲使一物必遂其生而不為私  
惠也惟天地生萬物所以資於人然代天而治物者常

為之節使其足用而取之不過萬物得遂其生而不夭  
三代之政如斯而已易大傳曰庖犧氏之王也能通神  
明之德以類萬物之情作結繩而為網罟以佃以敷蓋  
言其始教民取物資生而為萬世之利此所以為聖人  
也浮屠氏之說乃謂殺物者有罪而放生者得福苟如  
其言則庖犧氏遂為人間之聖人地下之罪人矣

跋華嶽題名

歐陽修

右華嶽題名自唐開元二十三年訖後唐清泰二年實

二百一年題名者五百十一人再題者又三十三人錄  
為十卷往往當時知名士也或兄弟同遊或子姪並侍  
或寮屬將佐之咸在或山人處士之相攜或奉使奔命  
有行役之勞或窮高望遠極登臨之適其富貴貧賤歡  
樂憂悲非惟人事百端而亦世變多故開元二十三年  
歲在丙午是歲天子耕籍田肆大赦羣臣方頌太平請  
封禪蓋有唐極盛之時清泰二年歲在乙未廢帝篡立  
之明年也是歲石敬瑭以太原反召契丹入自鴈門廢

帝自焚于洛陽而晉高祖入自太原五代極亂之時也  
始終二百年間或治或亂或盛或衰而往者來者先者  
後者雖窮達壽夭參差不齊而斯五百人者卒歸於共  
盡也其姓名歲月風霜剝裂亦或在或亡其存者有千  
仞之山石爾故特錄其題刻每撫卷慨然何異臨長川  
而歎逝者也

跋平泉草木記

歐陽修

右平泉草木記李德裕撰余嘗讀鬼谷子書見其馳說

諸侯之國必視其為人材性賢愚剛柔緩急而因其好惡喜懼憂樂而捭闔之陽開陰塞變化無窮顧天下諸侯無不在其術中者惟不見其所好者不可得而說也以此知君子宜慎其好蓋泊然無欲而禍福不能動利害不能誘此鬼谷之術所不能為者聖賢之高致也其次簡其所欲不溺於所好斯可矣若德裕者處富貴招權利而好奇貪得之心不已至或疲弊精神於草木斯其所以敗也其遺戒有云壤一草一木者非吾子孫此

又近乎愚矣

跋景陽井銘

歐陽修

景陽井銘不著撰人名述隋滅陳叔寶與張麗華等投井事其後有銘以戒又有唐江寧縣丞王震井記云井在興嚴寺其石檻銘有序稱余者晉王廣也其文字皆磨滅僅可識者其十一二叔寶事史書之甚詳不必見於此然錄之以見煬帝躬自滅陳目見叔寶事又嘗自銘以為戒如此及身為淫亂則又過之豈所謂下愚之

不移者哉今其銘文隱隱尚可讀處有云前車已傾負  
乘將沒者又可歎也

跋王獻之法帖

歐陽修

右王獻之法帖余嘗喜覽魏晉以來筆墨遺跡而想前  
人之高致也所謂法帖者其事率皆弔哀候病叙睽離  
通訊問施於家人朋友之間不過數行而已蓋其初非  
用意而逸筆餘興淋漓揮灑或妍或醜百態橫生披卷  
發函爛然在目使人驟見驚絕徐而視之其意態愈無



窮盡故使後世得之以為奇翫而想見其人也至於高文大策何嘗用此而今人不然至或棄百事弊精疲力以學書為事業用此終老而窮年者是真可笑也

讀李翱文

歐陽修

予始讀復性書三篇曰此中庸之義疏爾智者識其性當復中庸愚者雖讀此不曉也不作可焉又讀與韓侍郎薦賢書以謂翱特窮時憤無薦已者故丁寧如此使其得志亦未必然以翱為秦漢間好事行義之一豪雋

亦善論人者也最後讀幽懷賦然後置書而歎不已復  
讀不自休恨翱不生於今不得與之交又恨予不得生  
翱時與翱上下其論也况迺翱一時有道而能文者莫  
若韓愈愈嘗有賦矣不過羨二鳥之光榮歎一飽而無  
時爾推是心使光榮而飽則不復云矣若翱獨不然其  
賦曰衆囂囂而雜處兮咸歎老而嗟卑視予心之不然  
兮慮行道之猶非怪神堯以一旅取天下後世子孫不  
能以天下取河北以為憂嗚呼使當時君子皆易其歎

老嗟卑之心為翺所憂之心則唐之天下豈有亂與亡哉然翺幸不生今時見今之事則憂又甚矣奈何今之人不憂也余行天下見人多矣脫有一人能知翺憂者又皆疏遠與翺無異其餘光榮而飽者一聞憂世之言不以為狂人則以為病子不怒則笑之矣嗚呼在位而不肯自憂又禁他人使皆不得憂可歎也矣

讀封禪書

劉敞

劉子曰新垣平候日再中文帝以建元言汾陰有寶鼎

氣乃效於後平之於術亦可免矣其卒以詐死為世大  
僂何哉彼以其術為遠而飾之以巧以其利為迂而益  
之以諂者也敗不亦宜乎是故博學而精擇之正言而  
謹守之不為頃久變志不利鈍遷慮辟此患也莊周  
有言毋以人徇天毋以故滅命豈新垣平之謂邪悲矣

書种放事

王回

景德二年右諫議大夫种放賜假遊嵩山真宗御資政  
殿置酒餞放侍臣當直者四人預之時有司不宿戒宣

召既集皆相顧莫敢就坐上乃親定其儀翰林學士晁  
迥西面侍上資政殿學士王欽若東面侍上知制誥朱  
異南次迥待制戚綸南次欽若放北面對上示特客之  
云酒半上作七言詩一首賜放放奉和侍臣應詔皆作  
而欽若最後成二首焉初放養其母隱終南山講經書  
著嗣禹表孟子文秦蜀諸生多從之游其母好道家言  
修辟穀之術放阿其好終身不娶婦世以其能行人之  
所難益高之朝臣屢表薦聞太宗召之辭疾不出上即

位張齊賢以舊相守京兆又薦焉乃遣內供奉官周班  
齋手詔召放放應召既至拜右司諫直昭文館賜名第  
什器御厨給膳四遷至工部侍郎卒放雖居官屢請假  
還山上輒為作詩置酒餞之後賜兩制三館學士等御  
筵餞之於瓊林苑常手詔問以政事欲大用之放辭乃  
止昔堯起舜於畎畝之中位以司徒商高宗起傅說於  
巖野而位冢宰彼授受之際不嫌駭衆如此而功烈竟  
立豈藉其虛名而誕後世哉竊觀真宗特禮寵放近世

天子蓋未聞也而放之行乃叛其所學以棄人倫為難有君而無臣惜哉放既正己不足則其用捨行止之節曷議焉

書襄城公主事

王回

唐太宗長女襄城公主出降太常卿汾州刺史蕭銳初公主在女時篤行好禮太宗賢之嘗指以誨諸公主既降銳銳父宋國公瑀尚無恙而太宗勅有司為公主起第公主辭曰婦事舅姑如子事父母定省朝夕所以養也

而容別居者據何理也太宗不許而公主固辭不可奪  
太宗乃即瑀之私第其旁隋煬舊晉邸葺以為襄城公  
主第第成當施公主祭戟於門公主又辭曰禮無以抗  
於尊者為榮也今舅之門既立戟矣而更於女門施戟  
是婦抗於舅而為禮豈所以榮女也太宗不許而公主  
終辭不可奪太宗乃勅以公主祭戟并施於宋國公之  
門昔堯將任舜以天下以二女嬪之猷畎之中而不敢  
留於帝室者以舜有父母未順其心雖與天下舜必不



受也使舜受之顧非所以任天下者也周之王姬嫁於諸侯車服不繫其夫猶執婦道以成肅雝之德故其詩曰曷不肅雝王姬之車自秦以來祖於申韓之術其治務以隆君抑臣為甚天子之女特創其號曰公主而壻者不得自當其妃匹曰尚公主其弊之漸至於父母不敢畜其子舅姑不敢畜其婦原其故以隆君抑臣為治也而使人倫誅於上風俗壞於下又豈所以隆君而治哉嗚呼以唐太宗之明常指襄城以誨諸女可謂知其

賢矣然襄城辭切於禮而應於治古之效猶勞於再三而僅從其心則他公主之有舅姑者益亦別居耳蓋弊流於千載者雖願治之明主猶不能遽變其習也而一女子卓然出其間可不謂賢哉

書洪範傳後

王安石

王安石曰古之學者雖問以口而其傳以心雖聽以耳而其受以意故為師者不煩而學者有得也孔子曰不憤不啓不悱不發舉一隅不以三隅反則不復也夫孔

子豈敢愛其道驚天下之學者而不使其蚤有知乎以  
謂其問之不切則其聽之不專其思之不深則其取之  
不固不專不固而可入者口耳而已矣吾所以教者非  
將善其口耳也孔子沒道日以衰熄浸淫至於漢而傳  
注之家作為師則有講而無應為弟子則有讀而無問  
非不欲問也以經之意為盡於此矣吾可無問而得也  
豈特無問又將無思非不欲思也以經之意為盡於此  
矣吾可以無思而得也夫如此使其傳注者皆已善矣

固足以善學者之口耳而不足善其心況其有不善乎  
宜其厯年以千數而聖人之經卒於不明而學者莫能  
資其言以施於世也予悲夫洪範者武王之所以虛心  
而問與箕子之所以悉意而言為傳注者汨之以至於  
今冥冥也於是為作傳以通其意嗚呼學者不知古之  
所以教而蔽於傳注之學也久矣當其時欲其思之深  
問之切而後復焉則吾將孰待而言邪孔子曰予欲  
無言然未嘗無言也其言也蓋有不得已焉孟子則天

下固以為好辯蓋邪說暴行作而孔子之道幾於熄焉  
孟子者不如是不足與有明也故孟子曰子豈好辯哉  
予不得已也夫子豈樂反古之所以教而重為此譎譎  
哉其亦不得已焉者也

讀江南錄

王安石

故散騎常侍徐公鉉奉太宗命撰江南錄至李氏亡國  
之際不言其君之過但以厯數存亡論之雖有愧於實  
錄其於春秋之義

春秋臣子為  
君親諱禮也

箕子之說

周武王克商  
問箕子商所

以亡箕子不忍言商之惡以存亡國宜告之

徐氏錄為得焉然吾聞國之將

亡必有大惡惡者無大於殺忠臣國君無道不殺忠臣雖不至於治亦不至於亡紂為君至暴矣武王觀兵於孟津諸侯請伐紂武王曰未可及聞其殺王子比干然後知其將亡也一舉而勝焉季梁在隋隋人雖亂楚人不敢加兵虞以不用宮之奇之言晉人始有納璧假道之謀然則忠臣國之與也存與之存亡與之亡予自為兒童時已聞金陵臣潘佑以直言見殺當時京師因舉兵

來伐數以殺忠臣之罪及得佑所上諫李氏表觀之詞  
意質直忠臣之言予諸父中舊多為江南官者其言金  
陵事頗詳聞佑所以死則信然則李氏之亡不徒然也  
今觀徐氏錄言佑死頗以妖妄與予舊所聞者甚不類  
不止於佑其它所誅者皆以罪戾何也予甚怪焉若以  
商紂及隋虞二君論之則李氏亡國之君必有濫誅吾  
知佑之死信為無罪是乃徐氏匿之耳何以知其然吾  
以情得之大凡毀生於嫉嫉生於不勝此人之情也吾

聞鉉與佑皆李氏臣而俱稱有文學十餘年爭名於朝廷當李氏之危也佑能切諫鉉獨無一說佑見誅鉉又 inability 諍卒使其君有殺忠臣之名踐亡國之禍皆鉉之由也鉉懼此過而又恥其善不及於佑故匿其忠而汙以它罪此人情之常也以佑觀之其它所誅者又可知矣噫若果有此吾謂鉉不惟厚誣忠臣其欺吾君不亦甚乎

讀孟嘗君傳

王安石



世皆稱孟嘗君能得士士以故歸之而卒賴其力以脫於虎豹之秦嗟乎孟嘗君特鷄鳴狗盜之雄耳豈足以言得士不然擅齊之強得一士焉宜可以南面而制秦尚取鷄鳴狗盜之力哉夫鷄鳴狗盜之出其門此士之所以不至也

書刺客傳後

王安石

曹沫將而亡人之城又劫天下盟主管仲因勿倍以市信一時可也子獨怪智伯國士豫讓豈顧不用其策耶

讓誠國士也。曾不能逆策三晉救智伯之亡，一死區區，尚足校哉。其亦不欺其意者也。聶政售於嚴仲子，荆軻蔡於燕太子丹，此兩人者，汙隱困約之時，自貴其身，不妄願知，亦曰有待焉。彼挾道德以待世者，何如哉。

讀柳宗元傳

王安石

余觀八司馬皆天下之奇材也。一為叔文所誘，遂陷於不義。至今士大夫欲為君子者，皆羞道而喜攻之。然此八人者，既困矣，無所用於世，往往能自強以求別於後。

世而其名卒不廢焉而所謂欲為君子者吾多見其初而已要其終能毋與世俯仰以自別於小人者少耳復何議於彼哉

書沿淮巡檢廳壁

傅堯俞

巡檢職捕盜職舉則盜去如失其職兵皆盜也何則上既不戢下從而縱恃賴勢力侵漁良民非盜而何噫鼠竊狗偷者逐可去捕可擒係縲囚戮其勢易制至於士兵一得縱放則欺擾公行使民口膠舌結噤不敢出聲

是誠盜之巨者新息腋淮面山地雖褊隘實為咽喉故  
置巡檢提健兵百人以遏狂寇官事修舉民倚之得安  
存一非其人下罹苦害以區區之邑若先用百盜縱乎  
其間傍與它盜者併力賊之則雖欲背死趨生路亦無  
繇也曹君德華受命職捕盜既至頗革前弊約身廩馭  
兵嚴士不敢犯民則向所謂百盜者固以息矣於是封  
域靜寧帖焉亡驚居日多暇頗圖燕安先是視事廳風  
顛雨剝殆不可居德華醜之命工新其棟宇雖有取於

民半出私奉規模宏偉數倍平昔可以示壯大若益堅其庶益厲其嚴雖亡是廳不害居是廳不媿苟改其庶弛其嚴則是廳廣豁邃深軒危瑰琦更盛於今日亦奚以為哉徒增過重不德爾後人至者其庶與嚴思有以上曹君可也若曰某屋未豐於是廳某屋未華於是廳思以土木之功加之則可乎不可也吾懼來者不知而務侈以殘吾民志壁以示之

書賈偉節廟

王安石

息之滅亡移徙尚矣其俗頗好鬼視正直聰明之神則蔑然先是邑之南幾十數里有其故侯之廟國人事之簫鼓豆牢歲時甚謹而公之祠在新城之北密邇民間不遠數步門宇不崇奠享不恭人之至者歲無一二予甚疑乘間因詢諸故老僉曰侯之祠不信不祀則禍福時至賈公之神雖不祭不我為害予曰嘻來吾語爾侯為息之君不能保有爾衆至於喪社稷而亡國其身殞則其靈歇惡乎能驚動此民而禍福加於後世此其怪

妖依憑恐諸愚以倖祀爾若賈公者其民之主乎昔爾之先有子曰男曰女皆殺而不育公為邑之長嚴為制而禁之賴是生者以千數非公息民其遂絕爾將安出昔之男爾民之父也昔之女爾民之母也活爾父母而不報可乎況公之英風靈氣固當未泯以昔時之人今日未必無陰相也反以其不禍誣以其不能而怠之罪孰甚焉爾歸厚報爾之主可也無為奔走乎怪妖之庭況禮曰有功德於民則祀之是公之堂可祠而侯之廟

可廢惜也吾之賤而侯之廟在籍去之不可爾聽吾言而亟改則爾之休茂矣僉曰唯而心不以為然事如初異日過公之祠登公之堂傷民之過遂志於壁

活爾父母莫報不舉實吾神之侮為民禍尤豆牢是求則吾神之羞我瞻公之象昂昂可仰我想公之靈英英如生厚矣公德在息之國嗟哉息民忘公之仁嗚呼怪妖是趨明靈是誣爾則無知神不爾誅

書魏鄭公傳

魯 鞏



予觀太宗常屈己以從羣臣之議而魏鄭公之徒喜遭其時感知己之遇事之大小無不諫諍雖其忠誠自至亦得君以然也則思唐之所以治太宗之所以稱賢主而前世之君不及者其淵源皆出於此也能知其有此者以其書存也及觀鄭公以諫諍事付史官而太宗怒之薄其恩禮失終始之義則未嘗不反覆嗟惜恨其不思而益知鄭公之賢焉夫君之使臣與臣之事君者何大公至正之道而已矣大公至正之道非滅人言以揜

已過取小亮以私其君此其不可者也又有甚不可者夫以諫諍為當掩是以諫諍為非美也則後世誰復當諫諍乎況前代之君有納諫之美而後世不見則非惟失一時之公又將使後世之君謂前代無諫諍之事是啟其怠且忌矣太宗末年羣下既知此意而不言漸不知天下之得失至於遼東之敗而始恨鄭公不在世未嘗知其悔之萌芽出於此也夫伊尹周公何如人也伊尹周公之諫切其君者其言至深而其事至迫也存之

於書未嘗拚焉至今稱太甲成王為賢君而伊尹周公  
為良相者以其書可見矣今當時削而棄之成區區之  
小讓則後世何所據依而諫又何以知其賢且良與桀  
紂幽厲始皇之亡則其臣之諫詞無見焉非其史之遺  
乃天下不敢言而然也則諫諍之無傳乃此數君之所  
以益暴其惡於後世而已矣或曰春秋之法為尊親賢  
者諱與此戾也夫春秋之所諱者惡也納諫諍豈惡乎  
然則焚藁者非歟曰焚藁者誰歟非伊尹周公為之也

近世取區區之小亮者為之耳其事又未是也何則以  
焚其藁為掩君之過而使後世傳之則是使後世不見  
藁之是非而必其過常在於君美常在於已也豈愛其  
君之謂歟孔光之去其藁之所言其在正邪未可知也  
其焚之而惑後世庸詎知非謀已之奸計乎或曰造辟  
而言詭辭而出異乎此曰此非聖人之所曾言也今萬  
一有是理亦謂君臣之間議論之際不欲漏其言於一  
時之人耳豈杜其告萬世也噫以誠信待已而事其君

而不欺乎萬世者鄭公也益知其賢云豈非然哉豈非然哉

書資治通鑑外紀後

劉恕

劉恕曰孔子作春秋筆削美刺子游子夏門人之高弟不能措一辭魯太史左丘明以仲尼之言高遠難繼而為之作傳後之君子不敢紹續焉惟陸長源唐春秋吳楚之君僭號稱王誅絕之罪也左氏傳據魯史因諸侯國書繫年叙事春秋所貶損大人當世君臣有威權勢

力其事實皆形於傳故隱其書而不宣以免時難後漢  
獻帝以班固漢書文繁難省命荀悅依左傳體為漢紀  
言約事詳大行於世晉太康初汲郡人發魏襄王冢得  
紀年文似春秋其所記事多與左氏符同諸儒乃知古  
史記之正法自此袁宏張璠孫盛干寶習鑿齒以下為  
編年之書至唐五代其流不廢漢晉起居注梁唐實錄  
皆其遺制也國語亦左丘明所著載內傳遺事或言論  
差殊而文詞富美為書別行自周穆王盡晉知伯趙襄

子當貞定王時凡五百餘年雖事不連屬於史官蓋有補焉七國有戰國策晉孔衍作春秋後語並時分國其後絕不錄焉唐柳宗元采摭片言之失以為誣淫不繫於聖作非國語六十七篇其說雖存然不能為國語輕重也司馬遷始撰本紀年表八書世家列傳之目史臣相續謂之正史本朝去古益遠書益煩雜學者牽於屬文專尚西漢書博覽者乃及史記東漢書而近代士頗知唐書自三國至隋下逮五代惜然莫識承平日久人

愈怠惰莊子文簡而義明玄言虛誕而似理功省易習  
陋儒莫不尚之史學浸微矣按歷代國史其流出於春  
秋劉歆叙七畧王儉撰七志史記以下皆附春秋荀勗  
分四部史記舊事入丙部阮孝緒七錄記傳錄記史傳  
由是經與史分夫今之所以知古後之所以知今因善  
惡以明褒貶察政治以見興衰春秋之法也使孔子贊  
易不作春秋則後世以史書為記事瑣雜之語春秋列  
於六藝愚者莫敢異說而終不能曉也恕皇祐初舉進



士試於禮部為司馬公門生侍於大儒得聞餘論嘉祐  
中公嘗謂恕曰春秋之後迄今千餘年史記至五代史  
一千五百卷諸生歷年莫能竟其篇第畢世不暇舉其  
大畧厭煩趨易行將泯絕予欲託始於周威烈王命韓  
魏趙為諸侯下訖五代因丘明編年之體倣荀悅簡要  
之文網羅衆說成一家書恕曰司馬遷以良史之才叙  
黃帝至秦漢興亡治亂班固以下世各名家李延壽總  
八朝為南北史而言詞卑弱義例煩雜書無表志沿革

不完梁武帝通史唐姚康復統史世近亡軼不足稱也  
公欲以文章論議成厯世大典高勲美德褒贊流於萬  
世元凶宿姦貶絀甚於誅殛上可繼仲尼之經丘明之  
傳司馬遷安可比擬荀悅何足道哉治平三年公以學  
士為英宗皇帝侍講受詔修厯代君臣事迹恕蒙辟寘  
史局嘗請於公曰公之書不始於上古或堯舜何也公  
曰周平王以來事包春秋孔子之經不可損益曰曷不  
始於獲麟之歲曰經不可續也恕乃知賢人著書尊避

聖人也如是儒者可以法矣熙寧三年冬公出守京兆  
明年春移帥潁川固辭不行退居洛陽恕徧狷好議論  
不敢居京師請歸江東養親又以新書未成不廢刊削  
恕亦遙隸局中嘗思司馬遷史記始於黃帝而包犧神  
農闕漏不錄公為歷代書而不及周威王之前學者考  
古當閱小說取舍乖異莫知適從若魯隱之後止據左  
氏國語史記諸子而增損不及春秋則無與於聖人之  
經包犧至未命三晉為諸侯比於後事百無一二可為

前紀本朝一祖四宗一百八年可請實錄國史於朝廷  
為後紀昔何承天樂資作春秋前後傳亦其比也將俟  
書成請於公而為之熙寧九年恕罹家禍悲哀憤鬱遂  
中癰痺右肢既廢凡欲執筆口授稚子義仲書之常自  
念平生事業無一成就史局十年俛仰竊祿因取諸書  
以國語為本編通鑑前紀家貧書籍不具南徼僻陋士  
人家不藏書卧病六百日無一人語及文史昏亂遺忘  
煩簡不當遠方不可得國書絕意於後紀乃更前紀曰

外紀如國語稱春秋外傳之義也自周共和元年庚申至威烈王二十一年丁丑四百三十八年見於外紀自威烈王二十三年戊寅至周顯德六年己未一千三百六十二年載於通鑑然後一千八百年之興廢大事坦然可明昔李弘基用心過苦積年疾而藥石不繼盧昇之手足攣廢著五悲而自沈潁水予病眼病創不寐不食才名不逮二子而疾疹艱苦過之陶潛豫為祭文杜牧自撰墓誌夜臺甫邇歸心若飛聊序不能作前後紀而

為外紀焉佗日書成公為前後紀則可刪削外紀之煩  
冗而為前紀以備古今一家之言恕雖不及見亦平生  
之志也

宋文鑑卷一百三十